

dictæ præcedente thesi regulæ præbet exemplum. Justè is ac licitè cum offendatur, injusta ejus defensio mortis illatæ merito repensatur impunitate. Et istiusmodi offensio haud quaquam hîc supponenda. Injustè tantum alicujus vitæ periculum non nisi cum morte inferentis vitabile si inferatur, justè ab invasô bellum privatum suscipi primô latius diductum discursu. Secus itaq; invasorem occidentem in forô interiori haud excusandum putaverim. Deus καρδιογνώστης animum & intentionem occidentis respicit. Quare infelici ulciscendi aggressorem occidens rancore haud immunis à peccato. Lædendi adversarium intentio interdictam vindictæ includit turpitudinem. Etsi enim invasus occisionem invasoris ut medium ad sui defensionem intendere possit; ea tamen intentio defensionis tantum intuitu extra ordinem justa reputanda. Ast defensio & vindicta amabili gaudere nequeunt consortio. Defendendi animus occidentem ab omni injustitiâ præstat securum. Ulciscendi idcirco intentio contrarium dubio procul operatura. Ut aliàs ex agentium intentione actionum humanarum laus & vituperium dimetiendum; Ita & hic animus occidentis explorandus ad asserendam occisionis justæ vel injustæ evictionem. Eò ipso tamen, quò ex agentis intentione actionis conditionem æstimandam assero, reliqua, quæ ad actionis justæ vel injustæ constitutionem requiruntur, haud exclusa velim. Non ignorans, intentionem esse extrinsecum quid, naturam actionis & essentiam non tollens. Unde actionem per se malam ex intentione agentis bonam haud reddi exemplorum facilè probare posset inductio. In præfenti interim occisionis actu præcipuam in foro conscientiæ intentio occisoris absolvit partem. Ad defensionem corporis vitæq; si ea directæ, justum reddit actum. Cum minimâ verò vindictæ particulâ si conjuncta eadem, adeò tutum in conscientia haud reddit interfectorem.

VI. Atverò in foro exteriori tam rigorosum intentionis examen sibi locum haud vindicaturum. Sola offensio vitæ illicita, & proportionata ejusdem propulsatio securum reddit occisorem. Exterior propulsandi actus defensionis dicitur qualitatem. Vis atque injuriæ illationis duratio, ritè factæ defensionis  
cæteris